

寄庵詩文鈔

古今人之以詩著者豈徒以其詩哉必其人之志節總  
行足以歷久而傳遠而後詩乃因之耳吾師寄菴劉先  
生循吏也百姓贖歸

天子召用其居東治譜卽其詩之本也先生前後居東  
民樂政和多作爲詩歌經新城張莪石先生序之嘉慶  
丙寅告養歸居抱孫樓奉母之餘以吟以詠當是時太  
宜人年八十師年六十綵衣白首惟唐詩人卽爲得似  
之故其詩迄壬申得卷有七皆敘家庭之樂閭巷之情  
與夫交遊之概山水之趣癸酉以後主講五華詩悉不  
仕此數淳之得請業於先生也以癸酉歲顧役於衣食

不克朝夕几杖先生以淳能讀書市廛中特樂爲引進

之教之曰詩非身外物也吾不能畱吾之身以待後人

於是出吾之所蘊者以與後人相見凡涕者笑者正言

者寓言者千載下恆默相感焉深相喻焉而後可以謂

之詩噫詩一藝耳信如先生言非修身立名何以爲知

人論世地乎淳竊就先生之論詩求先生之立身無不

符合者有其本也淳奉先生教於茲九年矣又時時隨

侍先生登臨譙賞拈韵分題豈非厚幸而淳之詩僅沾

沾於體裁汲汲於字句也無其本也不善學先生者也

承命序是集汗下者累日願世之誦先生詩者鑒淳之

失求之於其本焉斯得之矣或謂先生詩當與趙州師  
荔扉先生分路揚鑣於金碧間也是猶方隅之見也非  
淳之所知也道光元年秋九月下旬受業呈貢戴淳頓  
首謹序

自癸酉歲寄菴夫子主講席始教五華弟子學為古近體詩每課必先出一首或數首相示與夫賓客讌遊之作故舊酬唱之章癸酉訖庚辰為詩八卷前三卷次入詩鈔續後五卷別為詩鈔續附續附之不已而再續再附殆與年俱進者歟及門中親承指授多所成就者聽獨以病廢頽然自棄於風雅然則聽安能讀夫子詩哉不能讀夫子詩安能學夫子詩不能學夫子詩又安能序夫子詩雖然夫子不云乎詩文之傳與不傳以詩文不以序也夫詩之傳甚遠而今之為詩蓋難經騷而降為漢魏為六朝為三唐為宋元明必出入於漢魏六朝

三唐宋元明而後可與言詩必脫化乎漢魏六朝三唐  
宋元明而後可以作詩其出入漢魏六朝三唐宋元明  
者研聲調鍊格律整體裁品其高下離合索諸神解妙  
悟創為別派正宗敝終身之精力工於語言文字而已  
若脫化乎漢魏六朝三唐宋元明則不然求之道德仁  
義以存其性察之喜怒哀樂以定其情厯之亨屯險易  
以試其才本之剛大中正以養其氣性情源也才與氣  
流也詩其旁注而側出也源遠流長而旁注側出浩乎  
莫測其津涯性情才氣之於詩猶是也性情深則才富  
才富則氣充行乎其所不得行止乎其所不得不止

以人為詩非猶夫以詩為詩者矣然後曠觀乎天地遐  
睎乎古今靜驗乎身世旁搜乎灾祥博覽乎昆虫草木  
鳥獸觸於中而發之為詩有悲有愉可泣可歌俛焉仰  
焉無入不自得焉人所欲言者言之人所難言者言之  
人所不言者亦言之此中有真性情在焉耳是則夫子  
之所以為教即夫子之所以為詩也置之漢魏六朝三  
唐宋元明中也可求之漢魏六朝三唐宋元明外也無  
不可聽從夫子有年敢以聞諸夫子者質之夫子夫子  
以為何如讀夫子詩者又以為何如道光元年辛巳十  
月立冬後三日受業門人高乃聽頓首謹序

寄菴詩鈔續附卷六 辛巳

雲南劉大紳

草堂見羅浮梅花

草堂春花數第一賓客過從少虛日仙令不賦歸去來  
剩粉殘香恐難必有時雨雪堆如山妙手幻出須臾間  
姚家魏家盡無色庭階獨見東風還滿園梅花百餘樹  
展裙風流不到處老夫眼亦今年青曠代逸才乍相遇  
問翁此種何殊尤翁言遠移自羅浮開時翩翩有蝴蝶  
絮量大小車輪周根株強半付枯槁洪鈞氣力運得到  
一枝突兀凌虛空千林萬樹齊壓倒我笑謂翁前計差



誤人洛陽牡丹芽從今再過三萬六年年此日吟梅花  
重關送行欲過雲安寺看茶花不果賦寄

落落詩僧不易尋聞鐘却憶古禪林燒空火樹曾留眼  
掠地瓊枝亦任心送客柳隄春草淺懷人花院暮雲深  
舊遊咫尺關前路正欲因風寄好音

作詩作賦總求工彩筆枝枝出袖中幾輩文人能氣盛  
此花好處是才雄未經一見應疑妄若使他移決不同  
生長南雲真有幸試從樓上謝春風

雪 正月初六日

下土無經營上天有眷顧春風吹雪來最先得玉樹夜

半傾黃金大力爭攫去盎然和氣周萬井同一雨俯仰  
憑取携鬼神莫余妒弱羽怯不飛健翮奮猶舉我欲往  
從之翱翔雲霄路未知虛空中可有賣酒處敲寒須醇  
醪敝裘不足禦

倩鄧壽之作雪中桃花畫

玩美春風有畫師烟輕霞澹甚相宜無人想到桃花樹  
開在山中雨雪時

戲簡戴占村

戴生不飲酒瓊漿玉液絕於口戴生不食肉淡飯黃齏  
在其腹腹中祇有陶謝詩儲王韋柳兼師之十年賦就

百千紙天機鼓動生不知公卿爭欲出門下勸以科目  
如唾遺三市街頭賣藥物風塵萬里羞驅馳韓康尙嫌  
不二價我欲逃名名我隨新年賀歲破俗例獨來從我  
譚移時自下及申潔腹去滿城爨火青烟垂送生出門  
久醉飽說與妻帑相笑嘻人醉爲端飽爲福獨清獨醒  
將何爲遣奴持詩達左右肉食誠鄙飲尤咎未能一石  
日五斗吾家伯倫可尙友戴生或然吾言否

和馬子雲寄雪山石詩

雪山望不見忽然入我屋寒光逼萬里積雪奪雙目大  
力誰負趨夸娥謝縮胸遠移無深心何以慰幽獨

聞道雪山雪由來自太始風日有時消增繼勢無已高  
處想近天苦心爲積累天人亦怯寒經年不一視

六月城市中炎威未易扇高人快登覽筋骨借雪鍊恨  
不凌空虛視如碎石片拂袖攜之歸一拳且戀戀

莫小於萬仞莫大於拳石萬物齊其理山石盡形迹臥  
遊固自可神交亦莫逆君心志冰雪我意在圭璧

元宵獨坐

怯寒懶對月附熱又羞火迂疎成老人元宵遂獨坐靜  
聞吹笛聲遠向玉樓墮吟詩與飲酒兩者又誰可  
強起披重裘扶杖倚庭戶雲閒流月光照見宿鳥樹夜

靜無啼聲有夢是反哺燈火休相驚禽鳥亦喜懼  
看燈人未歸春雷一何早風雨隨之來銀花勢欲掃南  
中氣候異羣情少煩惱未知古大臣於何抒懷抱

題松鶴圖

衆木易搖落風霜委大野元鶴來九天高枝何處假指  
端出神力奮筆爲揮灑偃蓋喬嶽松頓生斗室下  
天地有萬物成就因其材或求爲世用或自甘沈埋根  
生便不同一例難相裁漏矣畫師心所取祇草萊  
我遊空山中樽櫟棄弗顧獨依古松下烟雲任吞吐野  
火燒不及螻蟻輒相妒誰挾風雷權龍蛇化旦暮

閱世無古今挺立殊矯矯海濤擁天風羣耳以爲擾縱  
不供寵薪知已鶴外少謝家心跡同不復著凡鳥

卽園送海棠

多謝送花如送詩今春又得海棠枝瓶中不換前年水  
畱待明年二月時

出西郊暫過葉氏園林

春風到一月桃花出牆頭白如臘雪在紅作朝霞浮大  
道塵埃多望見銷煩憂田塍不嫌窄豆葉青油油叩門  
寂無應犬臥村居幽解事東鄰人啟扉延客休庭階花  
亂發

山茶海棠壯  
丹齊開矣

池沼魚羣遊新易好屋宇雲山仍四

周吾輩可久坐輿夫難淹留一詩賦欲就未許題高樓  
和卽園答謝海棠詩

剪紫裁紅苦作春詩家往往負花神鍾情半似登徒子  
不識窺牆宋玉鄰

亂呼鶯燕下樓臺歌舞筵前醉幾回多少衣香入影外  
溪邊越女浣紗來

好雲一層烟一層老眼分明自許能我欲夜遊花不睡  
月明誰買九華燈

對海棠花懷李卽園

澹紅猶自綴高枝淺綠新添細葉時未得送花入共賞

一春難補少陵詩

每見名花嬾放歌自憐白首易蹉跎  
春風反覆輕開落異日知誰得最多

對海棠花作

精舍靜如江上村曲欄杆外一花幡  
烟雲伴得花常在細雨斜風不到門

何曾含恨爲無香梅後清名數海棠  
舊說蜀中千萬樹昆明亦有碧雞坊

李泌身披一品衣腰肢稱得玉相國  
當年尙與人間事不及名花任意飛



偶吟海棠花

不判天仙與地仙吟詩盡欲鬥嬋娟  
挂帆若到三山土海內文章直幾錢

有人近向海邊居島上飛仙託寄書  
瑤草琪花無伴侶移根欲植玉堂廬

無端開遍野人家道是神仙語近夸  
豈識蓬萊山上客飛來變作海棠花

曉起

屋樹凝烟碧窗紗射日紅連朝無鳥語  
何處怨東風

成間鳥語矣

一詩裁賦就鳥語出春林  
知我相思久聲聲遏曉雲  
自笑人言拙不如鳥語巧  
遲來詩幸成添得一篇草

青春鸚鵡

蠻林熨箐成羣飛呼晴喚雨無是非  
一自虞人網羅巧綠雲遂與青山違  
閉置雕籠教說話美女珍惜醜女怪  
春來舊侶長相思寄語多言世所戒

楊柳樓臺

春風多情匝地起十二樓臺閒紅紫  
佳人鏡邊巧梳粧笑語聲出綠楊裏  
欄杆高壓花枝低下視彩燕雙雙棲  
柳絮飛來促不住遙遙送過短長隄

望高嶢楊莊介公祠堂

高嶢近接碧雞關  
杖戍孤臣老此間  
已說故鄉歸白骨  
猶傳遺冢在青山  
魚羹豆飯來祠下  
焚唱蠻歌出水灣  
夜夜湖陰波浪湧  
蛟龍歎息不生還

牡丹花下偶吟

長鬚赤脚爲花羞  
夢想深深十二樓  
斜捲珠簾飛燕子  
美人臨鏡自梳頭

晚烟羃歷揭牕看  
忽憶春花一半殘  
欲化游絲千萬縷  
絲絲繞護碧欄杆

和卽園鶯燕蝶蜂四詠

垂陽無數傍春城  
日日依依別有情  
遠送行人休亂折  
清陰深處聽啼鶯

歸來燕子及清時  
杏花春雨說相思  
一梁軟語無休歇  
不管孤鴻怨別離

舊衫破剪試仙風  
小苑輕飄花一叢  
依樣機牕新織錦  
裁成春服戲雲中

蜂屯蜂散爲春忙  
不出花間各有房  
誰似芝蘭先采得  
釀成甜蜜飼君王

再四詠

不宿人家玳瑁梁  
九成臺上戲相將  
聲聲謐隘聽難了

卷之六  
佚女何心覆玉筐

穿柳已如機上梭游絲織就巧偏多又嫌衆鳥無情思

不解吳聲子夜歌

義山詩鶯能歌子夜

荒臺如見舊姑蘇鬱鬱芊芊野草鋪蛺蝶飛來無大小  
翩翩還似鳳將雛

整人謗詡大如壺不及遊蜂細可娛嫩綠鮮紅憑點綴  
好同雙蝶畫成圖

### 柳枝詞

不向武昌官道栽小樓影裏燕徘徊無端竟混青旗色  
十丈紅塵攪不開

一縷晴烟上畫橋翠眉青眼恨無聊東君錯認迴風舞  
說是人前慣折腰

一重水外一重山家世流傳五柳間誤入王維詩卷底  
被人疊疊唱陽關

太液恩波此有無半生閱歷是長途淫淫灑盡多情淚  
濕透深根不會枯

東車西馬看奔忙古道蕭條挂夕陽冷落風流苴力鋪  
更無才子淚沾裳

盡日低回有所思桃花流水舊相知送行何與垂楊事  
折斷長枝又短枝

去年行

去年此時飲花榭白晝不足繼清夜春風早遲無定期  
人生到處有杯斝燕子不飛鶯不啼鸚鵡自挂屋檐架  
只愁夜月空山中杜鵑一聲淚如瀉蜀魂何與吾滇人  
丈夫胸懷自悲咤一家歡樂千家悲坐對春風不如夏  
東鄰潦倒來書生且與開懷說王霸笑看珠匣千金刀  
多年塵埋綠玉杷

金碧草堂邀飲花下

陳家老子太狡猾牡丹花開一尺大花神若策栽花勳  
更有何人敢稱最五華山麓望城東咫尺卽是神仙宮

十年經過百千遍每向二月吟春風平時評花不屑此  
及到花前輒驚喜玉環飛燕人中妖菊論容顏世無比  
醒來醉歸真快哉出門白首猶重回緋桃樹梢噪烏鵲  
知是明朝車馬來

續歌

謂十日前花已開門前曾無一人來謂十日後花已落  
千秋猶見此高閣花開花落不在花付與酒家並詩家  
沈香狂吟清平調君王妃子一齊笑杜陵野老愁煞人  
殘杯冷炙潛酸辛悲愉憂喜各有我富貴神仙無不可  
君不見身著錦袍陳仰山又不見頭戴笠亭劉寄菴



玉屏山麓墓祭

一夜青山叫杜鵑  
錢紙紛飛繞墓田  
阿母思兒千種淚  
茫茫恨是隔重泉

和李卽園吳井水歌

李生昨歌吳井水  
其言清深水難比  
清如春酒賡幽風  
義並秋霜肅曾史  
強藩逆罪同邱山  
至今名氏汚人間  
云何泉源冒若姓  
不恤宋賈羞爲班  
苴蘭人家十萬戶  
晝夜綆汲不言苦  
清晨第一爭井華  
調水真符插飛羽  
我生金碧常居停  
磁甌如玉浮茗青  
大笑江東陸鴻漸  
何曾好水傾銀餅  
却怪蛟龍太無力  
醴泉竟爲老澤得

一時文士如曹程定援天休頌功德此老遺臭此水香  
馴象隊隊曾驅將沾濡尙及百年後窮簷負擔謀稻粱  
差勝一井亦無有涓滴恩不到人口新瞞唾罵無時休  
王侯將相只速朽菊花村路何迢迢書生况味餘簞瓢  
當年無人解好事春風秋月空牢騷况聞陳姬擅寵幸  
幹邊時照美人影爲語李生請易名不呼吳井呼陳井

再過葉氏園林

碧雞關路太岫嶙別徑重尋綠野春自有畫圖如北苑  
不須鎖鑰問東鄰陶公但話桑麻長杜老偏憂盜賊真  
遙認漁舟浮水上憐渠卽是武陵人

三月晦前一日孫璞山過屬歌聊爲曼聲

孫卿乃肯過我廬今日已是春風餘立談片時便辭去  
呼奴且與牽衣裙邇來老況甚蕭率貴人絕交時有書  
二三好友數易盡轡轡遙聽朱輪車君來不留意何居  
床頭無酒庖無魚起視日影西移初

畱君暫住天晴明白日有情天有情我亦寂然無不平  
胡爲胸中長劒鳴昆水倒瀉華西傾風雷雨雹相縱橫  
武子是君何代祖憐渠當年善譚兵阿瞞奸雄不足數  
區區杜牧眞書生今年邊地飛欃槍金沙怒湧波濤驚  
江外江內無農耕餓莩殘屍相支撐君承家學誰爲勅

何不遲賦從軍行黃金印大先人爭家鄉封侯尊且榮  
學書學劍何所成向劉稽阮皆荒傖君歸乎休誰卿卿  
君有大扇我亦有清風卷舒在人後男兒意氣空消磨  
持之未肯暫離手我扇畫出美人多捧心顰眉好不醜  
君扇未及汙蒼蠅半輪明月映牕牖何不乞畫月中人  
霓裳羽毛侍左右蒼黃逕來求我書老顛早已禁杯酒  
斷無奇氣生行間蛟龍飛騰虎豹守街頭老嫗終怒嗔  
百錢不直等敝帚我扇却須君作書割取點畫卽瓊玖  
君持扇去驅蠅蚤我得扇歸看牛斗

聞烏

有耳曾不聾神爲萬籟出欣戚來無端迎距未可必幾  
悔受聰誤閉門守吾一有鳥非惡聲歡請若造膝始聞  
卽有得久聽遂相暱暫息思以深中懷惟恐失三春  
花鳥花疎鳥轉密亦知非鳳凰雖雄中呂律感謝大造  
私樹頭好風日

訪戴古村李卽園不遇

暫得靜中趣有客苦無賴三日無人來又多索居嘅是  
誠何心思竟如饑渴害詩文固小道術業藉以會今日  
天氣和行止懶卜蔡小奴背負囊老夫身束帶訪戴長  
閉門御李早張蓋茫茫天壤間捨此將安穉園林幸許

遊獨坐聽天籟歸想兩君心恐亦避埃壚相與可漆膠  
相思莫狼狽形疎神自親寄詩傾肝肺

獵人圖

短刀插在腰虎豹遇之無處逃長戟持在手熊羆見之  
誰敢走腥血汗乃羞凡庸麋鹿麕兔眼未有是何獵人  
乃如此高家司冠墨染指鬚髯蝟如晴漆如英風颯颯  
起生紙掀衣帕首身何輕草韡蹴踏山靈驚左袖長垂  
示閒暇不露手腕撫刀杷蒼天若使生斯人國家又見  
褒鄂臣黃金鎧甲赤弓箭重與結束增精神司寇閒情  
戲弄慣張家畱作耳目玩我今如見摩厲時欲食虎肉

寢虎皮更藉驅除衆鬼魅千村萬落同清夷

口占

虛堂閒坐忽生哀驚駭兒童著意猜顯晦事皆隨夢至  
歿存人盡上心來渺茫大藥求難得虛妄神仙去不回  
正好思量消遣法老元短李鬥詩才

連日雨

縱有遠行客誰憂長路泥嘯歌娼老子飽煖慰羣黎風  
雨連城暗烟雲入戶低四垂天一色不復辨東西

製衣吟

十年製一衣歲月速遲暮常恐裁縫勞不及閱新故徘徊

徊下刀尺擬議無衣賦朝來忽自笑修短固有數天地  
成毀間未聞得久任區區此形骸又何足喜懼良朋遺  
蜀繭貴重逾純素長夏宜單衣好風袖間度髦心如兒  
童行止影時顧七十不縫衣幾爲諺語誤從今歲一製  
趨婦織大布

端午後二日

積雨空山五月秋故衣棉薄易新裘扶疏柳葉無蟬翳  
磊落槐根有蟻遊曾向前朝悲屈子不知何日弔湘流  
盤飧角黍纏絲在老淚闌干正未收

艾虎



寄趙言劍續附卷六  
生愁市虎去時難結束偏從病草看自是小兒多作用  
盈腰莫怪棄幽蘭

蒲劍

青青出水使通神細認懸門寸節真竟似劍鋒驅鬼魅  
可能付與報恩人

日長

日長有客至暫與相周旋起送出門去獨倚庭樹邊清  
風不待約來在涼秋先吟哦領其趣詎必中聖賢俯首  
視根柢巨穴何時穿大蟻率衆蟻絡繹趨腥膻得失僅  
毫末聲息爭赴前感此心悽惻人事將無然一詩賦未

就綠陰西移磚

新竹

生氣盈天地竿竿記昨朝直根裁出土勁節已凌霄

月明

月明天有眼人亦展雙眉寄語山中友登樓是此時

清曉

名山佳氣多取用在清曉樓閣收宿烟初日上林杪獨  
坐繙詩書大意盡了了居處使之然未必是知道鄰近  
有市井形聲百千擾及此無一物爭競勢尙早親人者  
何物畱戀始春鳥雞犬與童僕相適亦自好欲書夜來

夢低頭費探討

戲和村門韻詩

老向人間任長如世外村偶吟詩欲就客至懶開門  
推敲時不定好友憶前村飛遞詩筒問黃昏尙候門  
神仙樓閣畫從不著荒村可識狂吟客無人說羨門  
記得王摩詰圖中有此村溪橋添拄杖籠鶴到柴門  
一笑無秦漢關心賣酒村頭巾看未破倒著出城門  
數日前山去他村如我村歸來人已醉誤叩北鄰門  
久謝公田佃催租任別村白雲閒管事猶自護重門  
買魚來柳岸沽酒向花村長恐風和月遲遲始入門

五華山雨中眺望

晴上五華山風雨倏而至鬼神乘氣機魚龍快心意蒼  
茫足趾下老眼得所寄喧聲一時息城市忽若易南望  
昆明湖靈蜃逞奇異噓唏樓閣成班倖乃不啻玳瑁齊  
新鮮鼉鼉競鼓吹龍女辭龍公人間小遊戲弄珠不贈  
人相與逞姿媚高興無終窮雄心生擬議欲將太華山  
吞咽棗梨視山神氣不伏巨靈共鼉屬水回波上掀峰  
頭石下墜風雨一倍增轟闐鮮彫劫萬象竟無睹咄咄  
嘆怪事少辨浮圖火浮出雙佛寺造者何人斯王家節  
度使生恐龍象衰死忘土木崇東西逼日月烏兔互迴

避一級萬膏血差我十三備傷哉古夷民歷劫迫叔季  
君相自求福誰下蒼生淚所以諸葛公南征不置吏獠  
狂風俗存雞豚得生字節鉞迴翔處祠堂頌幽閼至今  
千百年人知王佐器豈無賢侯王曾何足軒輊天雨與  
井水小利殊大利我欲從公遊東山策神驥追逐白鳳  
皇雲端亦鼓翅第恐風雨多平空盛鬼魅中心日以憂  
氣力日以媿歌罷天晴明下山神猶悸一路泥水多惜  
衣復惜屐寸步尙慎旃虛堂好假寐

葉映堂招飲園亭

城外有佳勝出遊豁心目逸興老如昨折簡况相趣去

年舊赤地今朝易青綠  
瀟然肩輿來溯洄水一曲  
門逕成屢經園林幸不辱

到門復延佇南望昆明池  
稱意買舟楫釣竿沈輕絲  
遙見楊柳灣孤帆去遲遲  
問知待我久仙侶舟裁移  
繫心亭沼間魚鳥長相思  
未能大觀樓追逐題新詩  
入門酒已熟清樽歡相持

四壁琳瑯多光輝照樓閣  
余詩廁其間得毋溷瓦礫  
回憶少年日使酒陵海嶽  
每笑李太白不敢賦黃鶴  
忽忽今幾年怕見客驚坐  
低首槃敦閒推敲勢不作  
禮法空斤斤何如阮稽樂

白日墮西嶺嚴城下門牡長揖歸去來夜遊興何有忽  
聞姁娥笑蟾兔住不走入世非飛仙往往受塵垢慙謝  
石林翁送迎意良厚煩翁向明月深深酌大斗

題龔石樵小相

平生最愛王右軍興懷每感蘭亭文風流瀟灑出儕輩  
杯酒意氣看浮雲鼠鬚禿毫寫繭紙白雲仙人入夢底  
舉似季倫輒欣然金谷園林豈有此書成醉後醒難能  
何由玉匣藏昭陵千秋至寶一朝失定武落水猶龍騰  
羣雄紛紛說八法宋人氣蘊元力乏蹄涔不識滄海傾  
拳石何當泰山壓圖中之人真書癡妻孥怪笑鄰兒嗤

臨摹記曾百千本高視筆冢深墨池知君矍鑠不言老  
開七年紀久已到腕力如虎睛如鷹兔毫拔盡麝煤擣  
丈夫絕技成盛名此身底用爲公卿畱將鬚眉待異日  
山陰道上聯騎行

反竿伎詩卽用其韻

脚跟平穩立長竿拔地升天莫道難第得虛空不傾墜  
任從人向下頭看

喜楊鳳池至同飲酒醉

少年縱酒如縱虎鼉作鯨吞不復數昂頭一嘯林風生  
百獸奔逃無處所老來畏酒兼畏人公榮次公誰主賓



第有齋日無醉日盈車麴蘖空生春去歲蘋婆長新果  
一嗅香風溢客座逢人不肯輕擲將沈浸餅中幾百顆  
與君離別經多年見面如飲醇醪先百尺高樓試開簾  
換羊有帖供腥羶蠟燭初張舌已出繆誤求人恕我醉  
腰間剩得紅毛刀尙欵及鋒斬鬼魅醉語史評同是非  
星月何事催人歸相期明晨理前話芙蓉池畔鸕鷀飛  
半夜消渴竟無比夢向龍宮乞海水蛟蜃驚怖魚鰕愁  
怕見揚塵萬丈底覺來百鳥齊喧呼詩成拜送堪盧胡  
仙人爲我上蓬島看取海水清淺無

同鳳池璞山古村湖心樓上分得冰字

四面芙蓉水危樓闌一層拈花將問佛檢韻不分僧屢  
照池成鏡長吟壁倚藤無因偕俗侶如語夏蟲冰

歌四首爲馬岳東作

名昱垣建水人

平城炊烟出高屋家人走報飯蒸熟長筵巨几陳東西  
不分疏水與梁肉祖孫父子齊相歡鼎前杳杳鐘聲殘  
起視衆犬共牢食餘粒剩與雞鶩餐

右共炊爨

長路漫漫客行遠曉雨晚烟競尺寸愁生中道無津梁  
烏鵲黿鼉盡遺恨幾人慷慨傾家資伐木輦石無休時  
羸秦神鞭用不著笑指天外飛虹霓

右修橋梁

浩浩洪波去不止豈有飛仙徑度此漏舟斷楫何由通

坐歎世人溺於水望古茫茫思大賢欲作萬丈高樓船  
尋常舴艋且輕試江流九曲凌風烟

右造渡船

賣刀賣劍太平久蠻夷烽燧未曾有養老扶幼安鄉鄰  
早晚醺醺一杯酒忽聞江外飛欃槍虎豹不憂憂豕羊  
男兒胸中甲兵足試看七尺何堂堂

右招鄉勇

### 贈楊春聲

楊生奮起西南陬眼空四海無朋儔長卿慕藺自千古  
赫赫欲與雷霆侔蒼山之高不可卽洱水之深不可舟

楊宏山

李中谿

之後又楊李

卽園

山川氣力無餘畱昨

朝有客閒過我告以姓氏瞠雙眸應爲舊勝解名盡不

見老成據龍頭從來知已不易得幾人物色風塵優  
國家賓筵鼓琴瑟食苹蒿鹿鳴呦呦姓名鳥飛到鄉里  
牽羊擔酒盈道周眼看小兒拍手笑老翁啞啞傾金甌  
昨朝今夕一人耳炎涼異態殊堪羞媿荀擬孟舊家世  
區區科第如雲浮藩籬雞鶩競飲啄鴻鵠萬里凌高秋  
與生相期更遠舉鳳皇鶩鶩同遨遊

他郎

夫子廟堂香樹梁歌

他郎舊隸元江近改隸普洱局於例不得有

至聖廟適歲庚辰諸生某某相率出私錢剏建焉求棟  
梁山中久弗獲一日毬香篝土人以大木告則毬香

樹也樹實玲瓏如繡毬狀而香凡谿壑不經見獨此  
簪有之地因以得名矣偕工往度于霄蔽日莫可仰  
視蓋千百年物也咸色然駭俄而風作異香撲鼻不  
止伐之鏗然作金石聲其長爲丈者九其圍爲尺者  
八竟體皆馬尾紋丁香節斑斕異采四旁羅列十數  
株如兒孫然拔其尤皆可用也於是 廟堂以成然  
其地東距城僅七里許耳數百年來官舍巫祠纍纍  
相望顧何以棄置不問得長畱至今日也豈所謂材  
大者難爲用耶抑亦物之用舍固自有時非其時則  
不出人亦不以告耶夫士亦若是也已矣段生思誠

徵詩於余因敬歌之嗚呼視漢柏梁何如也

夫子廟堂滿天下香樹棟梁世間寡他郎僻在西南陬  
自古無人覆片瓦一祠有無非重輕 聖道日月昭

昭行通經諸生獨太息仙宮梵院何縱橫深林夜聞鬼  
神哭處處榱桷杞梓禿香風吹來絲竹聲匠石山中顧  
大木從來小柱如卑人無端粉飾空斑璘一朝朽腐卽  
崩壓檐悲角嘯齊酸辛諸生仰行在闕里宮墻巍我到  
天止萬人奔走羣山開絜長九丈圍十咫遙想 夫

子初生時多應此木雙葉披雨風露霜歷千古材大難  
用今用之得傍門庭幸不朽平臨烟雲直摩斗甘心裁

言有言金縢附卷之二  
成繩墨間宜作青牛入水吼

答高瞿存

一堂詩人散何處春烟空種紅豆樹落花結子成相思  
慰藉相思賴尺素古今解事雙鯉魚無冬無夏頻寄書  
正如秋風一行雁不使南北音信疏開緘怪他絮語半  
秉燭兒童亦厭看中間試檢明月珠早被漁人取石鍛  
詩家別有相思情甕繭抽絲縱復橫并力風快剪不斷  
二匹文錦新織成寄到山中勝金玉百篇鏐琳又相續  
唐家舊聞李青蓮宋家更說蘇玉局如此詩人何日忘  
睡中欲試同夢方遺恨遙遙是道路不卽共嗅龍團香

雨中過九龍池戲寄戴古村

一雨秋容淨芙蓉剩幾枝高人長往處孤鳥獨飛時自  
有吟懷在空將酒興期待同明月夜醉和水仙詩

懷水仙

岸柳蕭疎點澹黃芙蓉池水淨生光秋來不用含顰舌  
日誦君詩口自香

中秋夜對月作

倚天問明月曾經幾中秋曾經幾許人相對深綢繆少  
壯常歡愉老大多窮愁天無兩明月人有千離憂一年  
復一年白髮空搔頭我欲乘巨槎或汎蓮葉舟去揖古



神仙羨門與浮邱乞取不死藥萬古鞭龍虬呼酒黃金  
闕題詩白玉樓大地同不夜醉眼看十洲爾時好明月  
殷勤爲久畱燭龍蠢無用慚惡隨逝流欲報明月德桂  
醕傾千畀姮娥不解飲我獨醉不休大笑徐福輩誕妄  
無與儔老擁童男女稱王東海幽長生藥何在野草埋  
荒邱黑月空山中鬼哭聲啾啾

十六夜對月

依然清迥似前宵却少飛虹駕彩橋九萬里天無客到  
二三更月向人驕啼鳥絮語情難遣宿鶴長眠恨未消  
回首酣歌年少日凌雲意氣正鸞鷟

十七夜對月

玉露金風到若馳人如宋玉有深悲欲歌欲哭當秋夜  
無雨無雲對月時屈指百年憑幻夢放懷千古付閒棋  
明將散髮深山去笑伴羣仙煮石芝

二十七日龐仁表寄詩至次韻

宦跡鴻爪如風流舊已歇數年歷十六何當憶明月相  
思恐傷神與汝皆白髮昌言再三讀天性盡激發

贈夏育萬

不死重相見山川抱病過身經馬蹄險影中蜮沙多大  
耄知誰並長貧奈爾何行將百二十倦眼看么麼

過廻龍山尋舊日看花處幾厄於犬

尙憶看花處言尋舊日門禪僧呼不應臥犬起將吞吾  
道無臧否人生有怨恩唁唁多汝輩一吠可無論

讀韓蘇集偶題

一夜霜風夢亦驚長空鴻雁唳秋聲孤檠短燭餘光在  
疏幔殘星剩影橫自古奸人皆善泣從來志士不求生  
韓蘇正氣陵山嶽畱得千秋此令名

夢訪龐仁表山館值其還家壁間畱詩和之

相思通一夢猿鳥萃秋林門掩飛泉急人歸落葉深閒  
畱貧士詠漫續小山吟問及鄰翁在登樓俯遠岑

節孝篇爲主錢氏作

才婦名易得節婦名難成青年矢志迨白首人世幾度  
經枯榮年復一年慎終始泣燕哀鴻風霜裏化石化雲  
心不甘 聖君賢相早知此綽楔表門何煌煌山川  
藉爾生輝光甲第麒麟倒欲盡有誰下馬公侯坊扶植  
名教乃不朽忠臣孝子共希有讀書識字人儘多要辨  
龍鳳與雞狗

墓祭前一夜

夢中歡笑語覺後茫無所墓祭卜明朝長愁今夜雨  
倚枕待雞鳴牆根不作聲陰蟲偏唧唧泣訴月三更

半載不登山松楸亦夢閒烏雅銜肉慣隨母早飛還  
死纔鼎俎陳祭畢秋天晚何似苦藜羹時時澆豆飯

璞山言九龍池尙有芙蓉花風流可賞因賦一詩  
搖落如名士曾經幾劫中汙泥仍不染衰柳自應同詩  
堪愁時剩仙心謫後雄秋風誰敢怨况復怨春風  
再賦芙蓉花

晚出自甘心幽棲翳翠禽水仙知共惜野老得相尋氣  
味清於古半標絕至今東風籠絡早只在百花林

### 悼倪童

呼名將二載於汝自心憐才豈蕭郎愛詩非鄭婢傳愚

頑宜事我疾痛欲搶天一夕分生死如何不學仙

夜雨

冬雨一如秋聲聲夜不休往年爲客處此境使人愁長  
路眠孤驛寒江醉小舟家居今復爾倦聽五更頭

十月晦日雪學歐蘇禁體

初冬吟詩若道雪人謂詩家太饒舌朝來大笑開門時  
翦水飛花早凝結天公憲事豈有常暇卽游戲便奇絕  
昨宵浙瀝全無聲狐貉重裘不曾設孤松虬鱗原未僵  
叢竹鳳羽倏將折前山律翠迷高低平地崎嶇失凹凸  
大呼兒童看畫圖私戒僕隸埽門闌拂箋却愁硯水冰

炭筆偏愛爐火熱從前涉足嫌穢污此日張眸喜清潔  
知我僻苦應久畱任人喧呼許相褻分無翠黛陳管絃  
欲向神仙訪巖穴豪情逸興無終窮縱當晦夜莫嗚咽

寒

重裘擁爐火尙嫌炭力少入冬未一月自笑怯寒早瘦  
骨天生成未必遽凍槁雨雪隨時消冰稜跡如掃皂雕  
摩遠空虛檐適衆鳥云何爲此態毋乃爲衰老出看年  
少人單衣類不少卽我昔年少意氣亦甚好大雪深山  
中酣呼達清曉人生莫附熱令名所當寶

初月

乍向牆西見吳鉤側不平別離經幾夜慰藉及初更再  
拜佳人意長歌烈士情更畱前日雪照耀自分明

挽趙小山詩人

張弓天道在鬼物獨相欺顛倒從生日艱難到死時出  
門無可語辟居昆明同穴有能詩先娶江南沈氏夢蘭

繼陝西王氏慧貞

似此窮才子如何不早知

未曾同嘯詠猶自廢眠餐怪得今楊

嶺谷李卽園悲如

古孟韓風雲傾意氣冰雪澈心肝三尺昆明土詩人淚  
不乾

小山臨死正值雪霽咀嚼快意而逝郭守愚挽以



詩云甘爲嚼雪死不作食肉生盡之矣無可益者別爲一絕句

一時名相范韓齊寂寂空山提徑迷幸是黃麻宣玉帝  
神龍萬里築沙隄

憶梅

雪寒月冷茅檐居春蘭秋菊同蕭疏山中知已有梅樹  
女容士用能相如我亦甘心願爲死從容短杖與蹇驢  
未到十月先問計逢人日寄雙鯉魚我年七十不爲老  
老我應爲相思渠造門任憑犬雞怪孤松叢竹齊迎余  
便邀雪月共笑遨一醉高臥梅花廬

草堂許寄羅浮梅久不見至以詩促之

讀罷南華歲暮時思量風信到遲遲夢中願作羅浮蝶  
飛上梅花第一枝

母親生日設祭

呼母死六年麻衣久已卻豈無雲錦裳斑斕不忍著豈  
無束脩羊不如侍湯藥人生難久長薜華竟弗若往日  
捧觴處寒梅倚高閣鄉園與客路同此慰寂寞卽今何  
所爲空憶昔歡樂泣然鼎俎閒老淚迸珠落

送何福田先生

風馬馳雲車仙人不肯住欲作畱行人我亦指歸路

自笑隔仙凡柳枯折不止烟雲深復深此去多知己  
送君如飄風思君如流水不解相思生第解相思死  
夢中我爲鯉恐君在山閒夢中我爲鵲恐君在水灣

又三絕句

雲來雲去兩心知一夜風寒欲雪時塵世交情猶戀戀  
如何輕賦送行詩

家在蓬萊第幾峰名山洞府自重重種得桃花門外否  
他年我欲繫虬龍

朝遊北海暮東瀛蒼鹿青鸞最有情慰藉相思容易甚  
紫簫一曲月三更

畱別五華諸子

歲月疾於鳥回首心茫然斤斤辨義利往往嗤時賢手  
揮塵尾敝膝著皐比穿諸君何所爲尙欲衣裾牽春林  
不常華秋月不常圓尊行苟不虧萬里猶比肩執蔭辭  
惡木渴飲羞盜泉名士喪生平悞念由腥羶鬼神集日  
手視指叢尤愆豈以一科第榮若登瀛仙勗哉諸故人  
一息爭千年我身雖睽隔我心常周旋

五華諸子螺峰山祖餞

巖壑消寒烟樓臺熾晴日登峰窺鳥巢臨洞瞰蛟室力  
弱行不休心閒景須畢第覺天地寬安知世途室忽憶

此是螺峰山左旋右折遊其間九迴愁腸正相似離筵  
四顧涕流潛思量春風蝶翠處裾屐雜沓經兩度羅浮  
仙種繭成無鸚鵡杯深餞歸去自信行人一身輕搖鞭  
近指鄉園路誰憐無數送行人欲去難去住難住歌一  
闕飲一杯悲風爲我從天來歸雲還羽相徘徊低頭楓  
林落葉傾成堆王侯豐碑碎斷重重埋繁華富貴安在  
哉滇水西去何時回我輩偶然散處休生哀停驂且與  
共訪前村梅

辟居荒村與朋友隔絕見聞既寡倡和亦無兼以羣凶  
嘯呼劫奪長路疫厲繼起屍骸紛如畏鬼畏盜憂已憂  
人偶有所述皆愁苦抑鬱之音少溫柔敦厚之旨去詩  
人遠矣秋氣且清風月漸佳將爲昆華之遊姑錄成編  
俟見諸故人時出供批抹使知不佞今年所得如此而  
名之曰畏鬼盜餘吟此後倘有適意之作亦附載之爲  
寄菴詩鈔續附卷七嗚呼世之名非鬼而實鬼非盜而  
實盜者可勝數哉而鬼與盜乃獨受吾指摘也鬼與盜  
亦將嗚嗚咽咽爲不平之鳴矣余其奈之何耶壬午八  
月丙午日書七六老人劉大紳

寄菴詩鈔續附卷七 壬午

雲南劉大紳

歸家

去時院落樹初栽  
歸日園林花盡開  
償得昆華別離恨  
如何阿母不同回

見梅花

獨立春風病起時  
梅花樹樹映疎籬  
雪晴記得名山夜  
多少才人賭小詞

夢李卽園

天地何其仁  
息人以良夜  
孤眠恐寂寞  
好夢又相假  
有

此樓中人昆華未命駕斗然至我前風雨從上下小酌  
聯詩歌長吟續杯斝奇巧逾鬼工捷疾速神化心知必  
是夢無夢何慰藉深感天地仁中夜思酬謝晨起緘此  
辭想君亦寐暇勿示譏誤人恐伊妒又罵

向上舍邀看牡丹

三月一日

養花天氣最溫柔正向昆明憶舊游小閣几筵仍醞藉  
少年杯斝亦風流時鄰上巳恰相稱人對衰顏祇自羞  
歸去夢中香不散裁知老眼得天優

夢張金門

一夢到三台春花簇簇開同行惟老友四顧失羣才意



氣忘生死精神適去來胡爲天水叟不共陟崔嵬

將上昆明以羣盜劫路不果

當道無虎狼戒心爲盜賊劫人肆白晝兵刃橫相逼煌煌聖明世薄海遍爲德千里不齎糧豈有饑餓色如何亡命徒效尤貪吏墨過客無賢愚禍患生不測迂儒仗忠信大道付荆棘春風缺墓祭咫尺行不得盜賊多勢焰官軍鮮氣力安得辟止辟舟車通南北

檢五華諸子詩卷

殘春懷舊友敝簾檢陳編一卷襟人鬼羣生殊地天東陵終壽考王佐喪天年自古皆如此茫茫問九泉

夢陳仰山

蠻山夷水久歸田齊魯同官已泐然名姓不曾翻仕籍  
交遊那得入詩篇每當落月歸雲候長憶餐霞飲露仙  
今夜故人眞在眼幾時沈醉百花前

入後山

家在山中住山中復有山松高蕞影靜草長屨聲閒莫  
憶登臨興曾經海嶽間一邱兼一壑且自屢躋攀

寄戴古村

有客遊昆明歸來爲我語道逢古村子自云日思予我  
豈不子思人事多齟齬萑葦聚盜賊郵亭止行旅性命

在人手憂懼實無所閉戶息聲影又虞鬼神侮盜賊萃  
生狼鬼神聚死鼠悠悠七尺身愁出復愁處悵望玉案  
山含淚謝鼎俎况有閒風情思及舊洲渚逍遙一壺中  
天地寬如許君外更何人嘯歌共風雨幾時慰相思要  
咸且懷糒

六月十三日大雨喜賦

霖雨天非無珍惜不輕下遂令點滴處珠玉讓重價祀  
龍歎冥頑焚魃惹笑罵難將老農淚傾潤好禾稼天心  
忽慨慷死苗慶肆赦腐儒亦歡欣典衣市酒炙醉後歌  
不休雨聲共晝夜

感詠

有鬼有鬼入人屋乘夜索酒兼索肉孤燈一點青於藍  
照見冠裳吏結束吏來時例飽其欲少緩須與遭笞辱  
銜杯下箸聲言誓仰臥睡然鼓其腹雞聲來遲鬼起速  
東鄰西鄰人盡哭

人孰不貪生人孰不畏死死人之宅生難居蒼黃移徙  
如流水土窟中草舍底風酸雨楚鵠鵲聲不止厲鬼對  
面嗔惡少背面喜明歸視家具蕩然一空矣

床屍溢城郭棺柩塞道路有人埋處無行處父子不相  
問兄弟不相顧醫家爭說神方多女巫降神舞婆婆病

人巫醫一堂死鬼大鬼小今如何大悲咒救苦經木魚  
滿街聲可聽今日何日鬼有靈家家呼天天不應  
今日不見昨日人明日不見今日鄰何處得有乾淨土  
千金買徙難辭頻傳聞崑崙山頂上五城十二樓相向  
神仙占住安鼎鑪肯許凡人著屏帳神仙少凡人多凡  
人病死神仙呵神仙厲鬼同心腹有淚不爲凡人哭  
道旁慰生弔死各一首

草草誅茅未設扉蝸廬風雨臥牛衣神仙恨不傳丹訣  
天上同時拔宅飛

飄飄一道白虹橋萬仞雲間鬼氣消假得生神經卷力

大羅天吏早相邀

晝睡

竹影松聲共一園才看清曉又黃昏  
蘼蘼做就莊周夢解事鄰家不叩門

紫薇花

不信晴霞後光輝又燭天  
負風雲自熱冒雨火逾然  
村樹分宮錦江花鬥木棉  
良宵燈燭處借汝照瓊筵

卽景

是誰餘晝軸留贈此殷勤  
岸失烟中樹山屯雨後雲  
飯牛青草共浴鳥綠波分曳杖皆鄰叟閒譚送夕曛

門前

樓居吟雨又吟風  
偶到門前竹樹東  
看見好山思買隱  
不知原住好山中

江上

青白雙潭並不渾  
分溝灌溉好田園  
橋頭笑問江中水  
濁浪年來壞幾村

潭中

青石磷磷漾白沙  
潭中曾不長魚鰕  
扶犁更比持竿好  
低處水溝高處章

刺桐花

綠玉叢深赤玉嵌溪流清淺雨廉纖飛來一陣黃鸝鷁  
占盡高樓客不嫌

村居

村居安井臼適意卽風騷竈冷薪常熟泉清米細淘菌  
香夷婦籠酒冽野人槽醉飽無餘事何須饋七牢

見桂花

六月二十四日前二日立秋

婆娑小閣雨生涼才到秋來便有香欲把殘書根下讀  
碧苔青蘚滿迴廊

崇蘭幽桂怨黃昏鎖鑰重重上繡痕長憶年年花發後  
人隨秋雨到重門



謝饋魚者

荷葉包魚勸晚餐  
微風細雨出湖干  
不嫌絮語調羹手  
恐作凡鱗一樣看

鉏草

竹徑蘭階草亂遮  
客來無計問烟霞  
長鉏得力如長劍  
一向閒拋舊莫邪

哭張煦亭孝廉

春城

善淫區福禍天道甚分明  
不使此人在將令何物生死  
兒空復托厲鬼故無情  
可怪西鄰夢先期到九京

孝廉將死托長男於其弟不知男已先數日死矣  
未死時鄰人有死而復生者云孝廉先在彼中

縱有

縱有喬松壽長生屬此身恐當歡娛處輒憶死亡人情  
不關山水時還憾鬼神眼前多少壯誰識予言真

憶昆明諸友人

一日遨遊尙有情九年詩卷在昆明句當稱意人誰怪  
酒到難醒我自傾長嘯鳳鸞迴嶺半曹縣縣東注會波  
風雪壓樓平歷城有會波樓離居盡是相思處海岱遙遙萬里  
程

村居二首

鄉村無結構早遂隱居情林鳥分朝夕山雲辨雨晴好

花時記姓怪石亦題名昨夜樵人過曾從險處行  
五畝宅邊宅三家村外村牽蘿遮土壁種竹代泥垣松  
借北鄰家鶴招東海門無因嫌寂寂正好辟羣喧

憶城中桂花

秋後無此香如何並菊荒宅從城外徙詩向夢中忙時  
至花頻發門關草亦長待隨雙健鶻醉舞舊山房

憶慈光寺桂花

婆娑雙桂樹曾閱幾秋風社友皆爲鬼山僧半是空時  
游還寂寞難到更疲癯况敢思仙女霓裳舞月中

剪秋羅

細綺輕純試舞衣  
吳姬著舊怨春暉  
秋風別有新刀尺  
花落猶能作蝶飛

鴉

作客思猿鶴歸來但見鴉  
往時同社鼠此際勝山魃  
小集人家避高盤佛殿驕  
一聞驚已甚同類况相招

對月二首

此事何年始懷人是月宵情  
文成痼疾性命殉風騷  
積雨應能免微雲或亦消  
晴明千里共俛仰自無聊  
賦詩相寄與同是此時心  
不識誰先就休言只獨吟  
骨凝秋氣合膽浸夜光深  
正值雙星節天河玉漏沉

七夕

天上精曜多雙星外惟月於星覘離合如月視盈缺欣喜多溢情悲憂每徹骨好詩留古今離騷續不絕渺渺銀漢隔杳杳鵲橋別天路剗奇險不爲衆靈設常見匹夫婦歡娛少嗚咽縱擬閨怨幽終似香奩裏請看此七夕光景祇一瞥巧拙各自守誰人卷其舌

顧南雅學士寄畫蘭

昨夜是七夕織女詣牽牛東西隔銀漢天路原阻修精神旣凝一萬里通綢繆羣鵲口銜尾飛駕長橋浮嗟我於夫子別離七經秋雲泥判出處天人同樂憂逾旬必

一夢語人恐承羞今午殷洪喬竟作寄書郵魚水君臣  
似膠漆朋友投古道見今日末俗類俳優開緘儼面語  
益以崇蘭幽夫子室雖遠夫子言可憐維畫我不識此  
意我能求盈腰敢服艾不愼薰與猶

書蟲吟

嬴秦君臣死有鬼化爲小蟲毒於虺歷千萬世讎詩書  
使其殘缺無首尾乍看紙面鋪輕紗上穿下漏無由遮  
旋如庭階埽落葉東西散亂秋風斜一行欲讀不能下  
宋槧藏本減聲價芸香麝馥空薰蒸太息無人善覆射  
書中氣味茫何知一心只如皇墳辭應恨當年火焰小

曾不大快坑儒爲嗟曉形軀爾微細未必真成口腹計  
可憐無辜殃壁魚齊向縹緗帙中斃新荆泥古同昏庸  
整餘萬卷橫心胷正斯有鬼渠亦有曹騰老眼休相逢  
一蠅付一虎有蠅逃無所奈何千百蠅虎乃以一數我  
欲呼天借飛廉廓然一力清寰宇

### 蠅虎吟

### 督豎子除草

草長未三尺嫉其已得志恐遂藏虺蛇更且蔭鬼魅長  
鑷并短鎌呼奴急一試根株務淨盡汙穢悉屏棄非不  
欲姑息難共蘭茝視請看落花日迎門尙擁簪小人不

努力與我豈同類菁菁美竹箭千尋聽日致

去蟻

木生受地力勢可參高天羣蟻心見妒入土攻中堅外  
掩人不覺漸次根柢穿雄圖據巢穴鬥聲轟相連勝算  
卽王霸好夢成安眠豈知嫉惡者更欲謀萬全么麼異  
蛇虎爲惡殊不悛旣已讎視木恩難於汝偏取諸付水  
火刑賞人有權事後或知悔熙熙終慕羶

月夜蚊聚

豈易見秋月陰翳斂遙夜甫對肌膚清骨髓久俱化幸  
不臥床褥敢以困疲謝回首風雨聲挾雲間一夏高樹



鴉初棲長空雁未下何物名爲蚊人肉甘於炙潛伏疑  
若無猛來駭其乍參伍爲比周百千聯姻婭遑問人與  
月相得重無價閉戶難玲瓏隔簾亦悲咤月卽汝私有  
何妨暫相假將無怨毒甚矢不退辟舍無聊且呼天涼  
颺請疾借

### 養氣

正氣天不私浩然付全人若非善爲養何以昌其身流  
俗惜不知私意窺洪鈞謂氣伸遇絀氣絀遇乃伸運會  
有通塞此氣無古今曾參易簣夕揚雄投閣辰兩者相  
并觀不朽誰爲真懿哉子輿言老矣書諸紳

讀少鶴集題後

不讀少鶴詩韓孟必不讀衆有未一除專集塞幾屋研  
色媚所同諧聲失所獨此人不知歌何望能知哭三子  
歌哭處屈宋共心腹萬物同肢體六合一氏族正氣快  
往來浮榮恥追逐大笑髯屢掀苦語頻頻願有耳咸驚  
塊無心始掩目憂樂匪一已於誰叩禍福請讀秋懷詩  
聲賦錄錄覺後羞前爲從今敬尸祝

桂花

雲隔人間仙宮憶舊班香風生一夜明月滿前山餘  
可能相拾他枝不共攀勝情饒覺後秋露濕松闌

瓶中桂花

未及成林日森森已自奇秋風一樹覺香氣四鄰知  
拘處黃雲覆吟餘白月窺石瓶清貯水浸潤卽方池

題畫

翠壁丹崖海上山仙人樓觀晚霞間昨日君裁爲此畫  
老夫早已倦遊還

山房

百歲幾山房勞勞大道旁愁深秋不淺夢短晝何長  
鉏草驅蛇遠翻書去蠹忙林鳩知欲雨樹樹喚斜陽

食雪梨

梨味何津津入口謝厚貺家園有此樹未必衆人餉崖  
蜜與蔗漿清氣盡相讓嘉名舊錫雪甜雪或可況渣滓  
都消融齒牙不復伐老人固衰憊咀嚼且隘妨外皮去  
淨盡內汁貯益盎晶瑩白玉髓一吸到中臟飲食原多  
方終竟憶年壯但免蒸食愚不令誚孟浪

食雞糍麪

旅食北方久噉麪心所甘溫涼性雖異下筋正自堪調  
和卻珍錯雞糍維產南釜鬻齊水火几案恣咀含口腹  
固人賤加餐亦常譚老翁異饅膳一食嘆可三由我知  
饑飽任人論廉貪

雨

三日霖如故人皆怨雨師應忘收稻候竟作插秧時生  
殺分高下恩威判早遲曾零春夏際杳杳望雲旗  
以酒下書幾至大困

美酒下奇書前人豈悞余興來忘斗計醉後遂泥如六  
合形骸寄三生寤寐餘嗒然成一笑行藥且徐徐

拂塵

呻吟才幾日几硯盡塵生低拂巾初試長歌劍已鳴螭  
涎留左右鼠跡埽縱橫萬卷從頭理燈光出短檠

中秋

俯仰乾坤幾酒卮  
清明風雨盡相思  
假如萬古原無月  
不識中秋可有詩  
作客淒淒傷遠別  
居家寂寂恨生離  
蟾光兔影多情處  
長憶歡呼少小時

戴古村酌詩至復答

相思故人意相忌  
外人口古今四千年  
各自爲左右加  
膝與墜淵我唯志  
不朽但恨詩中語  
其事未明剖想彼  
誆誆徒不過契焉  
嗾想我故人意  
斧柯不在手塵埃  
三十丈鹽地幾尺  
厚風雨一清灑  
山川少濁垢畏鬼  
畏盜餘人言當順  
受豈敢投虎豺或  
當置雞狗持君五  
言詩澆我一石酒  
中秋正今夜欲爲  
明月壽未卜天陰  
晴可

能照白首遙知翠海側又念索居叟相思兩不肥相見  
兩難後昆華不在天亦不在北斗東鄰借款段故人門  
可叩

十七夜同李載亭月下小飲

待月五日前遲君兩夜後月不照人人不來空藏醇醪  
二三斗參差竹逕傍晚過俄頃清光出林藪人生樂事  
何須他萬古閒愁付巨帚況是秔稻登場時村村善釀  
如紀叟如何相對不盡歡計較金尊與瓦缶醉憶采石  
江上頭玉貌錦衣共左右膾材覓得長鯨魚不識庖人  
解作否遽爾散髮騎上天冷落雲邊去買酒嗚呼李生

計太疎與君但訂名岳走

十八日始知爾振弟病故

惻惻清秋氣淒淒苦雨聲不知屍已冷猶意藥能生鬼  
卒戲人命醫師諳世情衰宗今若此難遣白頭兄

臥病

萬感填胸臆原非世外人何能遂不病獨自愛其身醫  
俗詩文在還丹藥餌真一逢風月夜好與奮精神

夜雨

苦雨入愁耳洪纖皆有聲披衣聽夜漏伏枕遠山城氣  
逼秋蟲寂心同旅客情從來天地大吾且適吾生



風雨

風雨登臨去山川自改觀未能扶短杖何以倚危闌苦  
語愁腸吐空杯病眼看晴明天賜與泥土一時乾

圍火

積雨便圍火驚疑此骨寒貴兒當面笑貧士改顏看從  
不因人熱將無結古歡試於霜雪際并取歷艱難

寄諸友人

自與羣賢別鈔詩遂不多興隨情減少人爲鬼消磨天  
地原憐我山川豈有他相期三萬日更迭短長歌

憶海門橋

幾家歸水結茅廬便是神仙島上居欲捉海門橋下月  
界魚石畔少鯨魚

界魚石

焚餘怪石絕無情上下湖鱗觸影驚近日遊人都界盡  
青天杳杳望昆明

刺桐鋪

刺桐花發記閒遊鸚鵡呼羣戲樹頭一路西風吹落葉  
青山頂上日悠悠

河澗鋪

衆山環合入雲青歷盡行程日已冥澗水不流波浪少

曾涵天上女牛星

晉寧州

關坡梁嶺路盤盤李秀城邊大道寬隔水蒼然山色好  
送將暮景與人看

吳井水

菊花村吳井水甘在口熱在耳清且香世無比第一泉  
不他擬我輩得力全在此有人聞之唾不止全家奔波  
八千里愁看妻孥餓欲死如何但教飲清泚此中有物  
宜遠徙乞得井砂符一紙上印天仙白玉璽換取貪泉  
舊渣滓旦暮嗜之甘如醴嗚呼昔人聞泣南夷金今人

乃唾吳井水彼其之子恥不恥

夜雨

天時人事日相侵秋雨聲多夜入心我與老農齊下淚  
淚痕更比老農深

喜阿象山至草堂

衰年拖病窮鄉村自驅妻子招清魂馬蹄聲停僕語雜  
驚傳有客來衡門積雨經旬不曾止高山峻嶺幾百里  
心中相思故人深眼底那得徑至此一見欣喜翻疑猜  
定視知非夢中來宿雨在衣泥在踝執手大笑浮雲開  
自言風雲快下上造次何嘗性命喪昏夜投宿無主賓

槽櫪床褥互依傍我亦言語全無倫一編詩草橫相陳  
未知甫白會合日交情可能如此真舊疾今看歸何處  
小園菁菁園竹樹新稻籼籼秋來多請生莫遽指歸路  
象山來草堂杜蘭江莊原田周步磚寒山馬見田  
元和諸子附書至

象山到草堂諸子附書至來者慰饑渴不來通夢寐人  
生離合際豈復容擬議秋風送秋雨一心聯兩地我昔  
春二三便欲乘小駟詩酒續重遊昆華補夙記盜賊縱  
虐焰怨毒繼鬼魅直過中秋月泥塗畏顛趾我若奮然  
往歡會當更異開緘如面談已得書數紙終羨神仙人

鸞鹿共遊戲萬里猶咫尺何勞羽鱗寄

夜聞叩門聲

此身非木石夜有叩門聲鄰里正多難山林亦自驚  
魂如香可返形使土能成不用頻憂患恬然到五更

重陽

家家爭辟難日日似重陽不待登高節纔言去故鄉  
雲山逢客慢雞犬逐人忙縱有茱萸酒誰能盡一觴

歸城中

我亦好樓居歸來認敝廬雖然鄰市井只似狎樵漁  
移石新兼故燒香數閒疏帶經慚古昔且檢舊藏書

重過李氏小山房留飲

蒼莽秋陰裡黃花老此身不辭今日醉難得昔年人謂金  
門及勿軒杜興翰高壯韓懷逼孟真木芙蓉亦好相對似江  
瀕

往砦中

來往愁風雨皇皇是此心偶然逢故舊只道返山林必  
待忘生死纔能洞古今漆園真大覺我向夢中尋

一樓

坐臥一樓中牕門扇扇空羣山爭落日獨樹敵秋風嬉  
戲懷年少文章讓客工壺觴知自貴笑指醉顏紅

憶雁

清唳誰如雁秋殘冀得聞一聲何杳杳羣響自紛紛夢  
遠三湘水愁深萬里雲不堪江上鯉夜靜影俱沉

生日四首

一笑千愁失長生又可期餐加秋徑菊卷益晚年詩鄰  
叟將紅稻山童送紫芝松喬人去遠盡日觸相思  
懸弧思吉日與祖實同生長恐孤先德難忘錫小名羣  
公矜閱藐予愧簪纓想在孩提歲猶能慰父兄  
昆華經戲綵慈母亦欣然倒屣皆名士飛觴及列仙未  
知今日樂能並昔年傳况復慚齊魯鄉鄉奏管絃



名香焚夙夜行事告天難自信才原短誰憐骨耐寒松  
筠參我老杯竿謝人殘山色東南好登樓獨自看

示保保孫

休言武帝白雲鄉家世嫖修自有常太乙星精真氣象  
淮南門客總荒唐居閒且作賣文計年富何求還少方  
衰老祇今如爾祖雄心不屑付斜陽

芭蕉

盡道芭蕉盡全於雪不宜南中殊氣候早有右丞知

蠟梅

澹黃花瓣蠟輕研香氣絲絲和曉烟疑是卽園親折送

枝頭却未繫詩箋

又一絕句

微雲疏雨冶遊遲  
空有鵝黃賦柳枝  
不及蠟梅花樹下  
襲人午麝散香時

良宵

良宵作好夢意氣殊跌宕  
望見古松子招我遊天上  
鸞鳳爲騏驥五色非一狀  
烟雲低在下日月近相傍  
俯視世間人奔馳迷去向  
糞壤互摺拾草木共淪喪  
苦心進忠言反訾余欺誑  
泣然泣不止淚下三千丈

閱壬午鄉試錄無卽園姓名

老汝欲何爲天心未可知健禽千仞陡良驥半途遲問  
已如無愧逢人定見嗤高文終不朽遠到更相期

小樓

石梯苔滑客難登宏景三層我兩層樓上讀書樓下臥  
夢中自署六朝僧

雨中看樓山

層層結撰號樓宜雨氣空濛看更奇定是羣仙此高會  
幔亭不使外人窺

雨中看庭前山石

私心憂旱舊如焚泰岱甘霖天下聞大造近來多作用

一拳山石亦生雲

雨

皇天覆萬物稼穡固其寶  
旱在秋冬交細雨亦稱好  
庭樹際搖落溫潤尙如膏  
田間有麥豆豈復慮枯槁  
第恐四海大厚澤未遍到  
起問行路人庶幾盡頌禱

柿子

橘柚寒烟外精盤可雜陳  
官庖嫌餽飣鄉味嗜鮮新  
圓滑宜孺子柔和益老人  
荔枝三百顆何處笑紅塵

白菜

肉食世人鄙菜根清白傳  
尋常中有味澹泊外無緣  
蠶

蘊冰霜共羹杯醢醬全忽思安肅種拔去竟多年

安肅種入

演輒變惟阿迷種者不變大爲地方民夫之累雖鄰境亦然土人相禁勿種有種者衆共踐踏之

### 爲人作書

染紙空傾墨一池行行盡作凍蠅癡若教寫後重回首便是炎炎秉火時

### 懷萃雲山

萃雲山上是仙鄉壯歲曾求不老方倦息中庭皆玉樹渴經半道有瓊漿東公王母留青簡明月清風弔白楊欲借茅庵尋舊夢夢回誰與煮黃梁

### 墓祭

一年兩墓祭寂寂無去來始葬云不吉改葬仍徘徊吁  
嗟人子心曾不生敬哀風水有餘蔭夜夜望三台第求  
已富貴遑恤親形骸餒鬼求飲食呼嘯出夜臺悲風捲  
地起無復錢紙灰古人列鼎祭肝腸尙崩摧漠然不一  
顧何殊委塵埃今日玉棺下明日佳城開雜遝致諸福  
徼倖胡爲哉

天平山墓祭不與

人子於父母雖老猶童孺在日瞻寢門旣歿視祠墓百  
年本易盡時祭能幾度山川鬱峰嶸冰雪凜寒沍精神  
自來往竟爲疾病悞夜夢披蒿萊晨興限道路兒孫誰

相攝僕輿棄不顧玉案百里外移家久難住出門見天  
平何至忘霜露假如父母在衡廬閒風雨中心一思我  
豈肯怯跬步孝思日衰薄有愧烏與兔正恐多牛羊踐  
傷松柏樹

早起望天平山

孤冢寄天平山高易風雨晨起出門看晴消十里霧

落葉

抱病一百日荒村復荒城閉戶祇獨語出門誰與營晚  
風來高樹落葉隨之傾飛空看欲舞墮地聽有聲指顧  
鋪黃金感喟無端生囊橐久已盡庭堦縱復橫何惜尋

言者言金經所卷七  
三  
丈地不使千百盈況此有畫意亦復多詩情僕婦胡爲  
來手中雙慧并埽之恐不力晚風相與爭美惡由喜憎  
強欲分濁清珠玉尙擯斥落葉何重輕

寶石歌爲魏燕庭作

魏子視山如視仇長鑱巨斧相虔劉山寶惟石愛不得  
肩擔背負重巖幽星出虛往星入實墻垣堆塞齊山頭  
山神憤怒欲拚命插血盟鬼來索求飛沙揚石暗白晝  
雷霆轟烈風颼颼怪雨繩粗雹碗大氣力所至奔千牛  
大聲疾呼震天地吾有此寶經萬秋人世知希寶乃貴  
守以虎豹圍以虯干汝何事偏無厭吾不汝克吾則羞



魏子神閉氣愈靜口講指畫與石謀時晦亦晦顯亦顯  
禹稷豈必師巢由在山石耳出山寶精光奮發看圖球  
山神不與固褊小我非貪夫汝何尤石拜謝山山乃捨  
從大匠門朝夕游形容不教改本色心思長與窮雕鏤  
詭譎靈秀各異狀麟鳳龜龍未爲優曩尊古樸鼎彝拙  
廟堂法物存商周山石寶矣魏子億十指僵禿無時休

### 夢

一寐一回夢夢夢如亂絲今宵矢不寐問夢何所之抽  
書古架上又是夢中詩古今幾好夢曾謁盧生祠此詩可作  
寄菴數十年夢跋亦可作寄菴數十年詩跋并  
可作寄菴數十年人跋也一言以蔽之曰夢

看萬松山紅葉同雲程弟

悟一草堂賦紅葉董子心力工形求天孫有錦闥無色  
金梭拋擲銀河秋龍山道上又獨賦遂少佳句奚囊投  
於今老望松山樹天地大文幸長留昏黑白日匿精彩  
雪霞還燭山蹊幽言旋寸步無傾跌餘光送人歸小樓  
不起董子同嘯詠幾令杜牧矜千秋清才幸與惠連共  
詩成定復驚雙眸

探梅

往日看梅不一村信風應早到名園抱琴野外隨携鶴  
拄杖橋邊徑叩門恐有人先題好句漫從客後酌清尊

百年老樹如相待纔向南枝駐月痕

尋梅

寒巖深處有茅茨幾兩芒鞋著不疑路到衆人難到處  
花開羣卉未開時欲來每慮樵夫悞將至還妨隱者嗤  
直待歡然成好友空山月夜盡相思

成前詩後憶昆華諸友人

昆華才子萃如雲賦到梅花古不交好境夢中神易受  
清詩壇外席難分世無玉樹誰能並身與瓊枝共出羣  
別後荒邨成獨往長愁吹笛落紛紛

往砦中見梅花

好友生平悵別離  
寒梅歲暮亦如之  
孤村近日閉門候  
小閣前年題壁時  
花發正嫌無客至  
我來且喜有孫隨  
入城不礙黃昏月  
此是園中第一枝

閒日又往砦中看梅花

名花樹樹觸人思  
況此遙從遠道移  
閒日不來如隔歲  
空林相對有新詩  
寒深自許春先得  
清極何憐世少知  
正恐滿園花發後  
尋常車馬盡奔馳

出東門

每出東門外  
常望故友

金門先生

廬庭軒屢易主  
花木尙思

余自古先賢宅  
多經舊史書  
誰能立片石  
爲表此遺居

小橋半坡尋梅

山迴水轉見村樓一杖徐行得自由可是梅花消息到  
羣蜂隨我上橋頭

北來行客逐諠譁破碎崖前一樹斜過午馬餓枯草短  
解鞍原不爲梅花

李生惠柏酒

近檢新詩草曾無一酒樓豈因名教樂不共達人遊舊  
量年年減今情事事休感君相厚意開甕蟻空浮

飲酒而醉更成一詩

滿地丹黃葉詩成酒亦空雖醇人自醉既老我猶中出

舌無儀衍澆腸失莽雄古來爭勝負何第小兒童

早看紅葉有感

昨夜宵中今眼中溪山曲曲擁屏風秋霜不著棠梨樹  
那得冬來葉倍紅

不似飛花落軟紅黃鸝無語怨東風從知松柏滿山澗  
都在冰霜成就中

梅花

日對梅花卽是仙欲尋佳句猝無緣難將品格降從俗  
要使精神並與傳巖谷文餐秋菊後園林冬嗅曉蘭前  
折枝莫向高門寄翠繞珠圍嗜好偏

夢

昌黎暫到玉川家  
思慮清瑩爲李花  
寢食經旬梅樹下  
如何猶夢牡丹芽

梅花

冰霜閱歷幾層層  
尋壑經邱倚赤藤  
孤潔祇宜偕野鶴  
清癯却不近山僧  
爲知己士誰相許  
作絕交書我未能  
獨笑行年過七十  
酒邊著眼漸瞢騰

樹底論詩未許寬  
天生此物是奇觀  
一枝敢負爭先出  
衆木從教往後看  
幸不風霜恣朽折  
休將牧豎肆盤桓  
世無處士林和靖  
獨上高樓倚曲欄

憶若中羅浮梅

羅浮風雨最迷離  
種向仙山有蝶知  
遷地常嫌如橘化  
開花自喜少鶯欺  
山林不耐懷人候  
冰雪偏當徙宅時  
一徑從容雙足健  
何須驢背始吟詩

憶鄰梅

誰使鄰家日閉門  
風情雪意出空村  
隔牆樹影烏孤啄  
繞閣花香蜂亂喧  
舊畫酒前難卒讀  
近詩燈下好重論  
昆華更欲消離恨  
車馬遙遙赴卽園

題前詩後

白頭搔遍苦吟哦  
江上城邊地不多  
樂事其中曾有幾



幽情此外定無他清如竹葉還相棄瘦似梅花更奈何  
身粹名榮人莞爾前生早已是詩魔

題後

亦信交傷命奸雄不我欺得無身死日始絕口吟時百  
歲如操券千秋有頌詩編年再三十萬首復奚悲

邀客賦梅花

苔封蘚裹幾曾枯尊酒囊琴鶴與俱著一花時便不俗  
在千林內自應殊將飛尙欲蒸爲雪已落猶將繪作圖  
正是溪山春到處何詩宋賦豈容無

花開原只在人間偏是看花人未閒萬事了時纔許至

千詩成後儘教刪由來國士都相賞豈有名姬不見攀  
一屐一裙行跡絕何妨搖落向空山

重賦梅信梅影各一首

去歲山中問隱淪梅花此際露精神微風慣作傳書使  
老樹羞如負約人早構詩篇夸座客先飛酒盞賀鄉鄰  
水仙亦許同時至喜聽聲音入耳頻

天然絕代一佳人驀地驚疑得比鄰不與癡兒同惡影  
如從畫苑獨傳神水深淺全無礙雲去雲來別有真  
埽淨庭堦休埽此好隨明月伴前身

啼鳥吟

棗樹高出屋重重作車蓋有鳥巢其顛養雛祝長大家  
世重反哺長大得所代雛出恐不歸懼爲鷹隼敗雛歸  
恐無得朝夕於何賴啞啞老鳥心雛鳥豈昧昧胡爲毛  
羽成結交匪其類追逐大觜鳥往來如鷄怪性情旣變  
易聲音亦鄙倍竟忘老鳥恩肆意任反背一片反哺心  
只爲饑渴害鳥母病不知鳥父存不快鳥父志四方雄  
有丈夫槩可憐鳥母雌終夜啼巢內棗樹不翦伐尙餘  
舊巢在不幸風雨多母乃墜巢外老夫聞之悲作歌寄  
長嘸世有采風人庶爲末俗戒

寄楊丹山

讀書望科第艱若上升夫旣得不知重沈身墜重淵國  
家設官吏九州纍百千本計安羣黎豈以供削胥物欲  
交相引好惡徇一偏笑罵不復顧刑威祇自專叱喝滿  
堂上唾涕盈門前握印曾幾日口碑已四傳愚氓無能  
爲賞罰爾有權 聖哲洞萬里難容行事顛惜哉甲  
乙科乃不直一錢得毋從師日志卽非聖賢爲麟不爲  
虎爲鳳不爲鸛盡得如吾子吾又何求焉賦詩遠寄與  
勗以心志堅上天聽不遠報最看三年

昔遊

夜向山中宿曉從山階行雲霧忽逼塞峯頂失崢嶸疲

馬嘶不定遊子噤無聲山高量丈尺渺渺不知程盡力  
陟其頂霧散雲下傾立馬四顧望灝氣相合并初日正  
照耀光輝射人睛直如九天上飛來白玉京又如大瀛  
海無復波浪驚銀浦如可泛瑤田如可耕乘槎不憚遠  
呼龍不辭撻雪鋪有凸凹雲聚無仄平山靈作此戲一  
物難強名惜哉時年少學詩猶未成曳白一字少淨域  
負水精境過五十載貯胸徒縱橫

吟詩

獨坐靜無事冬日移北牖偶成三四詩與古爲尙友澹  
泊原性生感激亦時有每當得意處吟哦不絕口遂欲

出示人尙恐唾而走剛存費脚踟起立袖雙手美惡無  
定評好惡成妍醜苦心終何爲誰能辨可否古今四千  
年幾詩不速朽吾將默無語終日事內守

弔豆兄萬春

童孫竟不遺天道此無知想注初生藉先書蚤天時相  
憐扶竹杖對坐泣茅茨忽見梅花樹猶餘昔歲枝

李氏小山房梅花

才盡前宵欲廢詩何緣此處又情移山中遠憶還相問  
樹底清吟豈遂癡不見八年成久別重過半日勝新知  
只憐哭弔傷心後雅管風琴尙失時

時豆兄  
同往

浣江橋梅花

荒村何處認吾廬，尙有梅花誼不疏。  
抱病來看開落未，小橋流水夕陽餘。

驚見香雲墮水間，枝禽根蟻兩相關。  
迴風留住橫斜影，不逐微波下別灣。

道旁孤立百年時，皎日蒼烟去若馳。  
裘馬往來人不少，幾曾著眼最高枝。

擬向橋邊結一樓，山容水態四時收。  
寒天醉臥梅花頂，不讀離騷不遠遊。